

Naqqiut

Siunnersuut 29. februar 2016-imeersoq taarserpaa

Inatsisartut Allattoqarfianit innersuussineq malillugu qulequtaata nutserneqarnerani iluarsiiisoqarpoq.

Matumuuna Inatsisartut Suleriaasianni § 33 malillugu Naalakkersuisut aalajangiussassatut siunnersuut manna saqqummiuppaat:

Atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiuteqartoqalersillugu ikiuinissaq pillugu Det Internationale Atomenergiagenturimi isumaqatigiissummut Danmarkip akuersinera pillugu inatsisip Kalaallit Nunaanni atuutilersinneqarnissaa pillugu peqqussummut oqaaseqaat pillugu Inatsisartut aalajangiiffigisassaattut siunnersuut
(Inuussutissarsiornermut, Suliffeqarnermut, Niuernermit Nunanullu allanut Naalakkersuisoq)

Tungavilersuut

Atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiuteqartoqalersillugu ikiuinissaq pillugu IAEA-mi isumaqatigiissummik (Ikiuinissamik Isumaqatigiisut) Namminersorlutik Oqartussat akuersissuteqarnissaat pillugu oqaaseqaatissamut Inatsisartut aalajangiussinissaat Inatsisartut UKA 2015-imi akuersissutigaa.

Isumaqatigiissummik tassannga Kalaallit Nunaata akuersinera tassaasimavoq inassutit, ”Uranimik paaallunilu annissuineq pillugu Nalunaarusiaq”-mi 2013-imi oktobarimeersumi nalunaarsukkat ilaat.

Isumaqatigiisut malillugu pisussaaffinnik piviusunngortitsineq Ikiuinissamik Isumaqatigiissummik Danmarkip akuersissuteqarnera pillugu inatsit nr. 464, 17. juni 2008-meersup Kalaallit Nunaannut atuutsilerneratigut pissaaq.

Tamatuma saniatigut Kalaallit Nunaannut naalagaaffiusumi nangaaffiusup atorunnaarsinnerata nassatarissavaa Namminersorlutik Oqartussat suliassaqaarfinni tigusimasani naalagaaffiup ikiuisup sulisuisa ikiuinermit suliassat sularinerinut atatillugu

akileraartassannginnerannik, aammalu ikiuiniarnermik siunertaqarluni naalagaaffimmut ikiuineramik pissarsisumut eqqunneqartunik atortussiani pigisanilu naalagaaffiup ikiuisuusup akileraarteqarnissamut, akitsuuteqartitaanissamut assingisaanullu akiliuteqartassannginnerannik isumaginninnissaat. Taamaattumik piviusunngortitsineq pillugu inatsimmi § 2, § 4 aamma § 5 Kalaallit Nunaannut atuutsinneqalinngillat, upalungaarsimanermik suliaqavissut aamma/imaluunniit upalungaarsimanermut ikiuuttut kiisalu akileraartarnermut tunngasut pineqarmata, taakkualu oqartussaaffittut tiguneqarsimallutik.

Imarisai

Ikiuinissamik Isumaqatigiissut aatsitassanik radioaktiviusunik piianeremut toqqaannartumik attuumassuteqanngilaq.

Ikiuinissamik Isumaqatigiissummut siunertaq tassaavoq nunat tamalaani sinaakkusiornissaq, atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiuteqartoqalersillugu naalagaaffinnut ilaasortaasunut piaartumik ikiuinissamik pissarsisitseqataasussamik, taamaalilluni malitsigisartakkat annikillisinneqassallutik, aammalu malitsigisaasunut inuuneq, pigisat avatangiisillu illersorneqarsinnaassallutik.

Danskini piviusunngortitsineq pillugu inatsisip atuutsilernerata nassatarissavaa atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiuteqartoqalersillugu Ikiuinissamik Isumaqatigiissummut naalagaaffinnit ilaasortaasunit allanit nunat tamalaanit ajutoornersuaqarnermi Kalaallit Nunaata ikiorserneqarfiginissaata pisariinnerulenera.

Piviusunngortitsineq pillugu inatsisip ilaatigut qulakkiissavaa – taarsiiffigitinnissamik piunasaqaat ikiuineremut atatillugu iliuitsinit pisuusimagaangat – Kalaallit Nunaat (erseqqinnerusumik aalajangersimasatut annertussusilimmik) taarsiiffigitinnissamik piunasaqaatit pisimasuussappata suliaasaqarfii tiguisimasat iluini ikiuineremut tunngatillugu akiliuteqarnermik isumaginnissinnaanera. Taamatuttaaq ikiuineremut atatillugu Kalaallit Nunaanni ikiuisuusutut sulisut pinerluttulerinermik inatsisaasunik suliaasaqarfimmi (erseqqinnerusumik aalajangersimasatut annertussusilimmik) unnerluutigineqarsinnaassannginnermik pissarsissapput.

Namminersorlutik oqartussanut aningaasaqarnikkut kingunerisinnaasat

Inatsisip atuutsilernerata nassatarisaanik namminersorlutik oqartussanut aningaasartuuteqartoqassasoq naatsorsuutigineqanngilaq. Taamaattorli nalinginnaasutut taarsigassarsisarnermut inatsisini malittarisassat tunngavigalugit ikiuuttut naalagaaffimmut/sulisuusunut taarsigassanik akiliinissamit akiliissannginneremut, aammalu ikiuuttut naalagaaffimmut/sulisuusunut taarsigassanik akiliuteqarnermut aningaasaliinermut tunngatillugu najoqqutassiassamik pissarsisoqartariaqarpoq.

Inuussutissarsiorfimmut il.il. aningaasaqarnikkut aqutsinikkullu kingunerisinnaasat

Inatsisip atuutsilernera inuussutissarsiorfimmut aamma innuttaasunut kingunerisassanik nassataqassanngilaq.

Tusarniaaneq

Aalajangiussassatut siunnersuut tusarniaassutinik nittartakkami tusarniaassutaavoq, aamma namminersorlutik oqartussat iluanni tusarniaassutitut nassiussorneqarluni.

Innersuussut

Atomip nukinganik pissuteqartumik ajutoortoqartillugu imaluunniit qinngornernik ulorianartunik pissuteqartumik ajornartorsiuteqartoqalersillugu ikiuinissaq pillugu Det Internationale Atomenergiagenturimi isumaqatigiisummik Danmarkip akuersissuteqarnera pillugu inatsisip atuutsilernissaa pillugu Kalaallit Nunaannut peqqusummik Namminersorlutik Oqartussat akuersissuteqarsinnaanerat Naalakkersuisut innersuussutigissavaat.